

簡

莊

疏

記

簡莊疏記卷七

海寧陳鱣撰

周禮

春官宗伯注唐虞列三代以宗官典國之禮與其祭祀漢之大常是也按漢書百官公卿表云奉常秦官掌宗廟禮儀景帝中六年更名大常注應劭曰常典也掌典三禮也師古曰大常王者旌旗也有大事則建以行禮官主奉持之故曰奉常也後改曰大常尊大之義也

守祧注違廟曰祧按廣雅云祧祭也五經文字序云若祧禰逍遙之類說文漏略今得之于字林據此知經典祧字皆出字林也說文云祧祭也從囟兆聲廣雅訓祭正與之合

然則眊爲祧之正字非漏略矣

世嬪注后宮官也王后六宮漢始大長秋詹事中少府大僕亦用士八人亦見周時用奄之義按漢書百官公卿表云將行秦官景帝六年更名大長秋或用中人或用士人師古曰中人奄人也詹事秦官掌皇后大子家有丞師古曰皇后大子各置詹事隨其所在以名官少府諸僕射署長中黃門皆屬焉師古曰中黃門謂奄人大僕秦官中太僕掌王后輿馬不常置

鞮鞢氏注鞮讀爲屨鞮屨四夷舞者屝也今時倡蹋鼓沓行者自有屝釋文呂忱云鞮革屨也鞞者鞞鞞按說文云鞞屮四夷之舞各自有屝从辵是聲鞞屨也从革是聲知周

禮故書作趺婁今書作鞮屨鄭注當云婁讀爲屨今本作  
鞮屨據釋文引呂忱云云知出于字林也曲禮云鞮屨注  
鞮屨無屨之屣也正作屨一切經音義引三倉云鞮毛丸  
可蹋戲者曰鞮蹋疑卽蹋鼓沓行之類

大宗伯云曰鬮辜祭四方百物注故書鬮爲罷鄭司農云罷  
辜披磔牲曰祭若今時磔狗祭曰止風元謂鬮鬮牲肖也  
鬮而磔之謂磔禴及蜡祭按說文云副判也从刀鬮聲周  
禮曰副辜祭鬮籀文副磔辜也从桀石聲許君從今書而  
曰磔釋文則與二鄭同也釋天云祭風曰磔郭注今俗當  
大道中磔狗云曰止風此其象公羊疏引李巡云祭風曰  
牲頭蹄及皮破之以祭故曰磔孫炎云旣祭披磔其牲曰

風散之史記封禪書云秦德公作伏祠磔狗邑四門目禦  
蠱菑蓋蟲生于風于文皿蟲爲蠱秦制是祭風遺制合諸  
先鄭注禮郭璞注雅則自漢及晉猶然賈疏云必磔狗止  
風者狗屬西方金金制東方木之風故用狗止風此言恐  
未得其實

小宗伯云兆五帝於四郊注兆爲壇之營域按說文云兆畔  
也爲四時界祭其中周禮曰兆五帝于四郊从土兆聲是  
周禮本作兆孝經云卜其宅兆而安厝之廣雅云宅兆葬  
也知古文作兆也

立軍社注社之主蓋用石爲之疏引許慎云今山陽俗祠有  
石主按此引許君五經異義也說文云祔宗廟主也周禮

有郊宗石室一曰大夫以石爲主左氏哀十六年傳云反  
祔于西圃疏引異義云祔石主也言大夫以石爲主謹按  
大夫以石爲王禮無明文士無昭穆不得有主今山陽民  
俗祀石主此與注用石合

甫竈注鄭大夫讀竈皆爲穿杜子春讀竈爲毳皆謂葬穿墳  
也今南陽名穿地爲竈聲如腐脰之脰釋文脰七歲反舊  
作粹誤劉清劣反或倉沒反字書無此字但有厲字音千  
劣反今注木或有作厲字者則與劉音爲協沈云字林育  
粹音卒粹者牛羊脂羸者更易破恐字誤按說文云竈穿  
地也从穴毳聲周禮曰大喪甫竈是經文本作竈讀爲穿  
者轉注通用讀爲毳者同聲通用今南陽名穿地爲竈指

其實聲如腐臑之臑者擬其音臑舊作臠或作臠釋文辨  
臠之誤以爲若作臠寧作臠蓋臠字說文有之臠則出於  
字林也

鬱人云和鬱鬯注築鬱金煮之以和鬯鄭司農云鬱草名十  
葉爲貫百二十貫爲築以煮之鏝中停于祭前疏司農云  
十葉爲貫百二十貫爲築者未知出何文按說文云鬱芳  
草也十葉爲貫百廿貫築以煮之爲鬱从臼冫缶鬱之其  
飾也是鬱爲正字鬱爲假字許君所說與先鄭同先鄭注  
百二十貫句下爲字衍文賈疏百二十貫爲築者誤讀也  
築以煮之卽肆師云築鬻耳鏝中釋文本作焦中云本又  
作鏝說文云鏝鏝斗也从金焦聲史記索隱引埤倉云鏝

器有柄斗似銚無緣音焦鑿謂卽漢之刀斗也

司尊彝云獻尊注鄭司農云獻讀爲犧犧尊飾以翡翠按說文云尊酒器也从酋卅以奉之周禮六尊犧尊象尊簋尊壺尊太尊山尊呂待祭祀賓客之禮尊或从寸許說作犧尊與先鄭合然說文牛部云犧宗廟之牲也从牛義聲賈侍中說此非古字蓋古作義耳下文獻酌鄭司農云獻讀爲儀儀酌有威儀多也立謂獻讀爲摩莎之莎齊語聲之誤也獻讀爲儀者如書大誥云民獻有十夫大傳作民儀有十夫漢書王莽傳作民儀九萬夫獻儀古音通也後鄭讀爲莎者詩閟宮云犧尊將將毛傳犧尊有沙飾也大射儀云獻酒注獻讀爲沙明堂位云尊用犧象注犧尊以沙



羽爲畫飾疏引鄭志張逸問曰明堂注犧尊以苾羽爲畫飾前問曰犧讀如沙沙鳳皇也不解鳳皇何以爲沙答曰刻鳳皇之象于尊其形斐斐然或有作獻字者齊人之聲誤耳然則後鄭注三禮俱定爲沙尊齊語誤爲獻也

司服云凡弔事弁絰服注弁絰者加爵弁而素加環絰故書弁作紕鄭司農紕讀爲弁釋文紕音弁按說文云覓冕也从兒象形與籀文覓从卅象形弁或覓字冕大夫曰上服也从曰免聲纁或从糸論語子罕云冕衣裳者集解包曰冕者冕冠也大夫之服也釋文冕鄭本作弁云魯讀弁爲纁今從古鄉黨篇亦然據此知古論作弁魯論作纁周禮古書作纁先鄭讀爲弁今本注作紕釋文音弁並誤

守祧掌守先王先公之廟祧注攝主所藏曰祧故書祧作濯  
鄭司農灌讀爲祧按書顧命云王乃洮類水三國吳志引  
鄭注洮類爲濯斝衣成事是鄭讀洮爲濯釋魚云鱗小者  
洮釋文洮眾家本皆作懼是翟兆同聲說文云洮祭也从  
月兆聲廣雅云祧祭也五經文字序云若祧禰迨迨之類  
說文漏略今得之於字林然則經典祧字皆出字林據廣  
雅訓祭與說文合知祧卽洮字非漏略矣

大司樂云王師大獻則令奏愷樂注大獻獻捷于祖愷樂獻  
功之樂疏引鄭志趙商問大司馬云師有功則愷樂獻于  
社春官大司樂云王師大獻則令奏愷樂注云大獻獻捷  
于祖不達異意答曰司馬云師大獻則獻社以軍之功故

獻于社大司樂宗伯之屬宗伯主于宗伯之禮故獻于祖也按王制云受命于祖受成于學疏周禮宗伯師還獻愷于祖司馬職云愷樂獻于社此記不云祖及社者文不具周禮不云獻愷于學者亦文不具說文云豈還師振旅樂也从豆散省聲是本作豈也

大傀異裁注傀猶怪也大怪異裁謂天地奇變若星辰奔竄及震裂爲害者按說文云傀偉也从人鬼聲周禮曰大傀異災瓌或从王襄聲今本說文引周禮或誤脫災字

鍾師云臧夏注杜子春云臧讀爲陔鼓之陔客醉而出奏陔夏按說文云臧宗廟奏臧樂从示戒聲陔階次也从自亥聲是臧爲正字許君从故書作臧毛詩序云南陔孝子相

戒以養也。鄉飲酒禮云：賓出奏陔。鄭注：陔，陔夏也。陔之言戒也。言戒則當作滅矣。子春讀爲陔，鼓者樂師。注：鄭司農云：若今時行禮于大學，罷出以鼓陔爲節。蓋从漢制。後鄭亦从故書，故稱杜說而不易字也。

華氏云：掌其燠契以待卜事。凡卜以明火，燠燠。注：杜子春云：燠讀爲細目燠之燠，或曰如薪樵之樵。謂所燠灼龜之木也。故謂之樵。玄謂樵謂炬，其存火。疏：子春讀燠樵二音者，皆作俗讀爲柴樵之樵。後鄭不从，依音爲雀意。取莊子燠火之義，熒熒然也。按說文云：燠所以然持火也。从火焦聲。周禮曰：以明火，燠燠子春讀爲細目燠之燠，當作面目焦之焦。傳寫之誤。說文云：燠目枯焦小也。卽其義。或曰如薪

樵之樵詩白華云樵彼桑薪是矣後鄭傅杜說而不易字  
與許君合士喪禮注燹謂炬以然火與此注同疏說非炬  
當作苴

遂歛其煖契注杜子春云煖讀爲英俊之俊書亦或爲俊玄  
謂煖讀如戈鑄之鑄謂以契柱燹火而吹之也疏煖讀爲  
俊者意取荆樵之中英俊者爲楚焯用之灼龜也讀爲鑄  
者意取鏡頭以灼龜也按說文云煖然火也从火交聲周  
禮曰遂鬻其煖煖火在前以焯焯龜是鬻爲正字歛爲假  
借子春讀煖爲英俊于義無取後鄭不易其字但擬其音  
疏說非

保章氏云以星土辨九州之地注星土星所主土也鄭司農

說星土以春秋傳曰參爲晉星商主大火國語曰歲之所  
在則我有周之分野之屬是也玄謂大界則曰九州州中  
諸國中之封域於星亦有分焉其書亡矣堪輿雖有郡國  
所入度非古數矣今其存可言者十二次之分也按左氏  
昭元年傳云子產曰辰爲商星參爲晉星尙書大傳云書  
之論事離離若星辰之錯行法言云吾不睹參辰之相比  
也文選蘇子卿詩云今爲參與辰又云參辰皆已沒本皆  
參辰連文自先鄭說星土以春秋傳曰參爲晉星商主大  
火蓋以昭元年傳參爲晉星誤與襄九年傳云辰爲商主  
大火相合後人遂以參辰爲參商矣說文云參商星也亦  
本先鄭參商連文日知錄以許君不知天文則誤讀說文

以商星解參字矣又姜宸英札記以鄭司農改左氏本文是忘卻左氏襄九年傳文矣後鄭注傳堪輿者占溥疏引鄭志張逸問厭對之義答曰案堪輿黃帝問天老事云云史記日者傳以堪輿爲占家之一漢書藝文志云堪輿金匱十四卷注許慎云堪天道也輿地道也文選揚雄賦云屬堪輿以壁壘注堪輿天地之總名也後人專以說地理爲堪輿失之

巾車云駟車葢蔽然覆注故書駟作龍杜子春云龍讀爲駟玄謂謂謂駟車側邊有衮飾也按說文云幣褻布也从巾辟聲周禮曰駟車犬幣是幣爲正字犬當作然因上文犬幣致誤既夕禮云鹿淺幣注幣覆笄玉藻云君羔幣虎植

注幣覆笏也少儀云拖諸幣注幣覆笏也皆作幣周禮蓋假帳爲幣傳寫又誤作窠耳或假幟爲幣詩韓奕云擗鞞淺幟毛傳幟覆式曲禮云素葢注箠覆笏也釋文葢木又幟葢葢又幟之變也子春讀龍爲駢者古龍駢通用易說卦傳云震爲龍釋文龍虞干作駢說文不同周禮故書作龍从子春也

司常云九旗之名物各有屬注屬謂徽識也大傳謂之徽號今城門僕射所被及亭長著絳衣皆其舊象按方言云卒謂之亭父或謂之褚注言其衣赤也說文云卒隸人給事者爲卒卒伐有題識者續漢書百官志云謁者僕射本注曰爲謁者臺率主謁者天子出奉引古重習武有主射以



督錄之故曰僕射又注補引漢官儀云亭長皆習設備五  
兵赤幘行勝帶劍佩刀設十里一亭蓋亭長赤幘絳衣也  
大司馬云師帥執提法鄭司農云提讀如攝提之提謂馬上  
鼓有曲木提持鼓立馬鞞上者故謂之提疏此先鄭蒞據  
當時已有單騎舉以況周其實周時皆乘車無輕騎法也  
按曲禮云前有車騎疏古人不騎馬經典無言騎者今言  
騎者當是周末時禮左氏昭二十五年傳云左師展將以  
公乘馬而歸疏引劉炫曰欲其公單騎而歸此騎馬之漸  
也鱣謂六韜云騎戰韓非云齊景公游少海傳騎從  
中來謁其背雖出於周末似古時本已有單騎而盛於戰  
國及秦漢者秦策云車千乘騎萬匹淮南說山訓云將軍

不敢騎白馬史記項羽紀云脫身獨騎樊噲傳云沛公留車騎獨騎馬噲等四人步從說文云騎跨馬也从馬奇聲釋名云騎支也兩腳別支也先鄭此注舉漢法以況周王伯厚漢制攷引曲禮左傳疏相證而困學紀聞獨不引周禮注何耶

以旌爲左右和之門注軍門曰和今謂之壘門立兩旌以爲之疏軍門曰和者左氏傳云師克在和不在眾田獵象戰伐故其門曰和門也按漢書尹賞傳云寺門桓東如澤曰舊亭傳于四角面百步築土四方爲屋屋上有柱出高丈餘有大版貫柱四尺名曰桓表縣所治夾兩邊各一桓陳宋之俗言桓聲如和今猶謂之和表師古曰卽華表也文

選東京賦云聚和樹表辭綜注和軍之正門爲和也然則和門卽桓門疏說甚謬此經下云帥其車徒以敘和東京賦正用之故注以爲軍門也

司燿云掌行火之政令四時變國火注鄭司農說以鄴子曰春取榆柳之火夏取棗杏之火季夏取桑柘之火秋取柞櫟之火冬取槐檀之火疏先鄭引鄴子書論語注引周書不同者鄴子書出於周書其義是一故各引其一言春取榆柳之等舊師皆以爲取五方之色同故用之今按棗杏雖赤榆柳不青槐檀不黑其義未聞按說文云燿取火于日官名从火萑聲周禮曰司燿掌行火之政令舉火曰燿取火于日當作于木先鄭所稱鄴子說是也漢書藝文志

云鄒子四十九篇名衍齊人爲燕昭王師居稷下號談天  
衍此說與論語集解馬融引周書月令同皇侃義疏云改  
火之木隨五行之色而變也榆柳色青春是水木色青故  
春用榆柳也棗杏色赤夏是火火色赤故夏用棗杏也桑  
柘色黃季夏是土土色黃故季夏用桑柘也柞櫛色白秋  
是金金色白故秋用柞櫛也槐檀色黑冬是水水色黑故  
冬用槐檀也此卽賈疏所謂醫師說

射人云祭祀則饗射牲注今立秋有獾麝云按說文云膾楚  
俗以十二月祭飲食也从肉萑聲一曰祈穀食新曰膾膾  
風俗通義祀典篇云謹案韓子書山居汲谷者膾獵而買  
水楚俗常以十二月祭飲食也又曰嘗新始殺也食新曰

羆臠一切經音義引三倉云臠八月祭名也法書問道云  
不臠臠也與李軌注臠八月旦也今河東俗奉以爲大節  
祭祀先人也漢書武帝紀云臠五日如漳曰臠音樓漢儀  
注立秋羆臠伏儼曰臠音剗剗殺也蘇沐曰臠祭名也羆  
虎屬常以立秋日祭獸王者亦以此日出獵還以祭宗廟  
故有羆臠之祭也後漢書劉聖公傳云欲以立秋日羆臠  
時其擊更始續漢書禮儀志云立秋之日所牲名曰羆剗  
羆剗之禮祠先虞執事告先虞已烹鮮時有司告事乃逸  
巡射牲獲車畢有司告事畢注補引古今注曰永平元年  
六月乙卯初令百官羆臠鄭君此注引漢制以證射牲蓋  
臠有二說楚俗以十二月祭飲食漢時八月祭卽說文後

說風俗通義同牒爲祭名續漢志作劓乃假借賈疏從伏儼注以爲劓殺也非

方相氏云掌蒙熊皮注冒熊皮者以驚散疫癘之鬼如今魃頭也按說文云顛頭醜也从頁其聲今逐疫有顛頭是顛爲正字魃爲別字可子非相云仲尼之狀面如蒙與楊注其方出也其首蒙茸然故曰蒙俱亦當作俱淮南精神云視毛嫫西施猶顛醜也高注顛頭也方相氏黃金四目衣赭稀世之類貌非生人也但其象耳目顛醜言極醜也古義止引應劭風俗通說似未備

隸僕云掌釋宮門之事注鄭司農云蹕謂止行者清道若今時做蹕釋文蹕音畢做又作警按說文云蹕止行也从辵

畢聲史記梁孝王世家云擬于天子出言蹕入言警漢書  
文三王傳云出稱警入稱蹕注引漢書儀注皇帝輦動左  
右侍帷幄者稱警出殿則傳蹕止人清道也古今注云警  
蹕所以戒行徒周禮蹕而不警秦制出警入蹕謂出軍者  
皆警戒入國者皆畢止也蹕竝當作趨大司寇云使其屬  
趨注故書趨作避杜子春云避當爲辟謂辟除姦人也元  
謂趨止行也趨今本作蹕惟釋文从走與說文合全書趨  
字皆轉寫誤蹕矣

司弓矢云獻矢箛注箛盛矢器也以獸皮爲之續漢書禮儀  
志注引干竇曰箛今之步又按說文云箛弩矢箛也从竹  
服聲周禮仲秋獻矢箛釋名云矢其受之器以皮曰箛謂

柔服用之也續漢志注明通俗文云箭箠謂之步又與干注同詩采薇云象弭魚服箋云矢服也服卽箠之省

園師云夏庠馬注故書庠爲訝鄭司農云當爲庠玄謂庠廡也廡所以庇馬涼也按說文云庠廡从广牙聲周禮曰夏庠馬許君不从故書與先鄭同後鄭訓廡亦與許合釋名云庠正也屋之正大者也御覽引通俗文云客堂曰庠蓋庠爲兩廡之高大者故以正屋客堂言之而可以庇馬涼也或省作牙俗作衍

秋官司寇云以佐王刑邦國注刑正人之法孝經說曰刑者例也過出罪施疏孝經援神契五刑章曰刑者例也過出罪施也下例爲者也行刑者所以著人身體過誤者出之



實罪者施刑是以尙書云眚災肆赦怙終賊刑按王制云  
刑者例也例者成也疏刑者例也上刑是刑罰之刑下例  
是刑體之例訓此刑罰之刑以爲刑體之例言刑罰之刑  
加人體例又言例者成也言例體之例是人之成就容貌  
據此知例卽刑字剛字說文所無蓋出於緯書後人因以  
改經文耳

條狼氏注杜子春云條當爲滌器之滌玄謂滌除也狼狼屬  
道上疏狼屬道上者謂不蠲之物在道猶今言狼藉也續  
漢禮儀志注引干寶注滌狼氏今卒辟車之屬按干注作  
滌狼依子春易字後鄭注狼屬疑作狼戾孟子滕文篇云  
樂歲粒米狼戾趙注狼戾猶狼藉也饒多狼藉並捐於地

與此注狼戾道上正合

庶氏注庶讀如藥煮之煮驅除毒蠱之言書不作蠱者字从聲疏庶是去之意故爲庶不爲蠱也是其取聲按韓詩外傳云驅驅後漢書鄭康成傳云起起皆趣起之言今凡驅除作聲曰庶庶是其意正字通別出哱字以爲驅雞聲謬甚

柞氏注鄭司農云柞讀爲音聲啗啗之啗屋竿之竿疏讀从春秋行扈啗啗之啗又爲屋竿之竿者皆从音同也按說文云謗大聲也从言咎聲讀若竿啗或从口然則啗竿聲同左氏昭十七年傳云九扈爲九農正疏引賈逵曰行扈啗啗晝爲民驅鳥者也疏本此

薙氏注書薙或作夷立謂薙讀如髡小兒頭之髡按說文云  
髡髮也大人曰髡小兒曰髡談苑云唐朝宮中常于學  
士院取眠兒歌者卽剃胎髮文也剃乃髡之俗字今小兒  
初生一月使繡工髡胎頭必曼聲歌之若祝兒則俾者是  
眠兒歌遺意

菴菴氏注鄭司農云菴讀爲菴菴讀爲爵菴之菴謂巢也立  
謂菴古字从石折聲按說文云菴上摘山巖空青珊瑚隋  
之从石折聲周禮有菴菴氏菴行蠶菴从艸族聲菴本蠶  
菴與巢相類故爵巢亦謂之爵菴晉書左貴嬪傳云修成  
晉菴分繭理絲正指蠶菴

赤艾氏注赤艾猶言赫艾也主除蟲豸自種者按說文云魃

旱鬼也从鬼攴聲周禮有赤魃氏除牆屋之物也詩曰旱魃爲虐蓋本旱鬼因以名官是魃爲正字鄭注赤攴猶言拈拔者乃以同聲相訓說文云拈裂也从手赤聲拔擢也从手攴聲今除物猶云拈拔

蝮氏注鄭司農云蝮讀爲蟻蟻蝦蟇也月令曰螻蝮鳴故曰掌去蠃蝮蠃蝮蝦蟇屬書或爲掌去蝦蟇玄謂蝮今御所食蛙也蟻乃短弧與按釋魚云蠃醜詹諸在水者蝮郭注取蝮也似青蛙大腹一名土鴨說文云蝦蟇蟇也从虫段聲蟇蝦蟇也从虫其聲蟻短弧似蠃三足以气射害人从虫或聲蝮蟻又從國蝮蠃蝮也从它象形蠃蝦蟇也从蝮圭聲蓋詹諸蠃蝮蝦蟇及蟻爲四物今浙人呼詹諸爲蠃

施呼鼃黽爲田雞呼蝦蟆爲蛙蟬呼蚻爲射工周禮蠃氏  
本借蚻字重文以名其官疑取其聲之國國故後鄭注掌  
去鼃黽云齊魯之間謂鼃爲蠃黽耿黽也蠃與耿黽尤怒  
鳴爲聒人耳去之後鄭注蚻蠃本二字許說合而爲一鼃  
與耿黽本二物許說亦合爲一漢書五行志云元鼎五年  
秋蛙與蝦蟆羣鬪則二物可知今說文鼃蝦蟆下疑脫一  
屬字

鄉士云士師受中協日刑殺注鄭司農云協合也和也和合  
支幹善日若今望後利日也玄謂擇可刑殺之日疏月大  
則十六日爲望月小則十五日爲望利日卽合刑殺之日  
按論衡譏日篇云祭祀之歷以血忌月殺之日爲凶又辨

崇篇云血忌不殺牲而屠肆不多禍此所謂利日者蓋避血忌月殺之日也

司刺云壹宥曰不識注鄭司農云不識謂愚民無所識之謂識審也不審若今仇讎當報甲見乙誠以爲甲而殺之者疏甲乙者輿喻之義耳按韓非

云罪生甲禍歸乙

伏怨乃結漢書韓安國傳云蒙獄吏田甲張湯傳云湯之客曰甲張華甲乙問云甲娶乙爲妻後人娶丙徐中叔服讓云母爲甲先夫爲乙後夫爲丙先子爲丁繼子爲戊皆假名甲乙也

職金云榻而璽之注鄭司農云榻書其數量以著其物也今時之書有所表識謂之榻檠按說文云榻桀也从木曷聲

周禮曰楬而書之廣雅云楬槩也漢書尹賞傳云楬著其姓名師古曰楬杙也杙杙于瘞處而書死者姓名也蓋先鄭注楬槩本當作楬架故釋文不出音釋宮云雞栖于弋爲桀弋卽杙也蜡氏注於此廣雅槩乃杙之別字一切經音義引說文楬槩也从俗改耳

庶氏云掌除毒蠱以攻說禱之嘉艸攻之注嘉艸藥物其狀未聞攻之謂燻之按釋艸云蒿山蒜物類相感志引孫炎曰帝登蒿山遭猶芋艸毒將死得蒜乃齧之解毒乃收植之能殺蟲魚之毒攝諸腥羶此孫炎乃唐人作疏者誤以蒿爲山名然蒜可解蟲毒至今猶然本艸云甘艸解毒名醫曰一名美艸是美艸豈卽嘉艸歟又蘭艸殺蠱毒辟不

祥蓋庶氏掌除毒蠱宜以此等香艸熏之

翬氏云掌攻猛鳥各以其物爲媒而掎之注猛鳥鷹隼之屬  
置其所食之物於絹中鳥來下則掎其腳疏若今取鷹隼  
者以鳩鴿置於羅網之中以誘之按說文云囹譯也从口  
化聲率鳥者繫生鳥以來之名曰囹讀若譌囹或从絲非  
戶錄引字林云囹音由今獵師有囹也文選射雉賦云慮  
吾游之晏起徐爰注游雉媒名江淮閒名謂之游游者言  
可與游也鱣謂游乃囹之假借與游說謬囹卽翬氏所謂  
以其物爲媒也

翦氏云掌除蠹物以攻崇攻之以莽艸熏之注蠹穿食人器  
物者蠹魚亦是也莽艸藥物殺蟲者以熏之則死按釋艸



云薺春艸衍義引孫炎曰藥艸也俗呼爲薺艸郭注一名  
芒艸本艸云莽艸殺蟲魚名醫曰一名薺一名春艸中山  
經云朝歌之山有艸焉名曰莽艸可以毒魚郭注今用之  
殺魚

大行人云三問三勞也焉問不恙也按釋詁云恙憂也郭注  
今人云無恙謂恙憂也司儀云問君問大夫注問君曰君  
不恙乎對曰使臣之來寡君命臣于庭問大夫曰二三子  
不恙乎對曰寡君命使臣于庭二三子皆在聘禮云公問  
君賓對公再拜注拜其無恙曲禮云主人不問賓不先舉  
注客自外來宜問其安否無恙趙策云歲亦無恙耶民亦  
無恙耶王亦無恙耶楚詞九辨云還及君之無恙呂氏吳

用篇云孔子問弟子曰子之公不有恙乎子之父母不有恙乎子之兄弟不有恙乎子之妻子不有恙乎說苑云魏文侯問趙倉唐曰擊無恙乎倉唐曰唯唯若是者三又問曰子之君無恙乎史記李陵傳云霍與上官無恙乎皆有無恙之問知古禮如此也風俗通義云恙蟲毒也古人艸居露宿故相勞問必曰無恙然恙之爲蟲無可攷見說文云它上古艸居患它相問無它乎其解恙字云憂也亦同爾雅蓋應氏牽合之耳

寧客云車三秬注十稷曰秬每車三秬則三十稷也秬讀爲秬秬麻答之秬按說文曰秬二秬爲秬秬五稷爲秬晉書律歷志云九章商功法程秬麻麥一斛積二千四百三

十寸此秬秠麻笞蓋九章語

考工云攻皮之工函鮑注鄭司農云鮑讀爲鮑魚之鮑書或爲鞞蒼頡篇有鞞發釋文鞞匹學反音朴劉音僕疏藝文志蒼頡有七章秦丞相李斯所作鞞是其一篇內有治皮之事故引以爲證也按說文云鞞柔革工也从革包聲讀若朴周禮曰柔皮之工鮑氏鞞卽鮑也許君所據周禮亦假鮑爲鞞蒼頡篇文法如急就篇有鞞發者謂其篇內有此二字車人注引柯櫛同疏說似誤說文云發柔革也从北从皮从夂省讀若奘今本作斐傳寫之誤墨子節用云凡天下羣百工輪車鞞鞞陶冶梓匠使各從事其所能亦正合作鞞史記宋世家云昭公弟鮑革徐廣曰一無革

字蓋鮑革卽鞞革以是爲名猶昭公名杵臼春秋傳作公  
子鮑乃單舉耳說文鞞讀若朴者鐘嘗遇鮮使臣自言姓  
朴讀若鞞此可爲鞞朴音同之證

設色之工蠶績鐘篿幌注鄭司農云幌讀爲芒芒禹迹之芒  
按說文云幌設色之工治絲練者从巾荒聲一曰幌隔讀  
若荒是幌爲正字喪大記云帷荒注荒蒙也在旁曰帷在  
上曰荒是卽一曰幌隔作荒者假借讀若字耳荒芒俱从  
亡聲故亦讀爲芒幌俗作幌非今京師市肆縣帛以表著  
名曰望子卽幌字也望芒音同

搏埴之工陶瓶注鄭司農云瓶讀爲甫始之甫元謂瓶讀如  
放於此乎之放按說文云瓶周家搏埴之工也从瓦方聲

讀若抵破之抵抵破之抵疑作取破之取說文云取敗耳也與先後鄭讀不同然瓶从方聲放亦从方聲故後鄭易先鄭讀爲放也

加軫與鞮焉注鄭司農云鞮讀旃僕之僕謂伏兔也疏旃僕之僕者讀音同而未聞所出也伏兔也者漢時名今人謂之車展是也按說文云鞮車伏兔也从車美聲周禮曰加軫與鞮也釋名云展似人展也又曰伏兔在軸上似之也又曰鞮鞮伏於軸上也先鄭讀爲旃僕之僕疑作冉有僕之僕以上文不樸屬云樸讀如子南僕之僕也

輪人云欲其掣爾而織也注鄭司農云掣讀爲紛容掣參之掣玄謂讀如桑蠧蛸之蛸疏紛容掣參之掣者此蓋有文

今檢未得按說文云掣人臂兒从手削聲周禮曰輻欲其掣爾史記司馬相如傳云紛容蕭蔘漢書作紛容蕭蔘郭璞曰紛溶蕭蔘枝竦擢也蕭蕭一聲之轉故後鄭讀如蛸也

望其轂欲其眼也注眼出大貌也鄭司農云眼讀如限切之限釋文眼魚懸切按說文云鞵鞞齊等兒从車昆聲周禮曰望其轂欲其昆玉篇云鞵古混切是鞵爲正字今周禮作眼與鞵音義相殊注云出大貌也先鄭讀如限切俱甚費解疑當作暉說文云暉大出目也从目軍聲玉篇云暉公困切此注當云暉眼出大貌也鄭司農云暉讀如鞵切之鞵方與說文之鞵及釋文之魚懸切合

稭理而堅注稭致也鄭司農云稭讀爲奠祭之奠按說文云  
稭種概也从禾眞聲周禮曰稭禮而堅蓋稭爲密致聘義  
云縝密以粟注縝致也縝卽稭之別字釋詁云苞稭也郭  
注今人呼物叢致者爲稭書疏引孫炎曰物叢生曰苞齊  
人名曰稭蓋考工記多齊語也

則穀雖敝不歆注鄭司農云歆當作耗玄謂歆歆暴陰柔後  
必燒滅疇革暴起按說文云歆艸兒从艸歆聲周禮曰穀  
雖敝不歆蓋歆爲氣上出兒漢書自敘云曲陽歆歆亦朱  
其堂文選寶鼎詩云吐金景兮歆浮雲歆爲艸盛上出兒  
故後鄭云歆暴旰人云辟暴注暴墳起不堅致也荀子勸  
學云木直中繩輮以爲輪其曲中規雖有槁暴不復挺者

輒使之然也異爲炮之假借說文云施面生熱氣也淮南  
說林云潰小施而發煙道高注施面氣也或作爆一切經  
音義引聲類云爆熾起也謂皮皸起又或作驟西山經云  
雖渠食之可以已驟郭注驟謂皮皸起也然則敲炮者謂  
上出起炮也先鄭作秬是稻屬非此義故許及後鄭不從  
也

以其圓之防梢其藪注梢除也防三分之一也鄭司農云梢  
讀爲桑螵蛸之蛸藪讀爲蜂蛸之藪謂穀空壺中也玄謂  
此藪徑三寸九分寸之五壺中當幅留者也蜂藪者猶言  
罍也藪者眾幅之所趨也按說文云枋木之理也从木力  
聲梢木也从木肖聲操車藪中空也从木臬聲讀若藪阮



侍郎曰圓之防當依說文作柎木理也今从自作防字相假借理柎一聲之轉輪人曰稭理而堅疏理而柔此言順穀木中直理除去穀中心木而爲藪非言其圓也鱣謂詩斯干云如矢斯棘釋文棘韓詩作柎是言其本之直可以證圍之柎也梢作梢者字之誤讀爲螺蛸者擬其音釋木云梢梢擢郭注謂木無枝柯梢擢長而殺者蓋長而殺如削去其末故云梢除也操作藪者假用讀若之字急就篇作榛操之誤碑作桑桑之誤也

則無槩而固注鄭司農云槩楸也蜀人言楸曰槩元謂槩讀如涅从木熱省聲按先鄭以槩爲楸蓋讀爲藪說文云藪煎茱萸从艸藪聲漢律會稽獻藪一斗內則云三牲用藪

注蘋煎茱萸也漢律會稽獻焉爾雅謂之檄疏引賀瑒曰  
今蜀郡作之名藪也釋木云茱檄醜茱郭注檄似茱萸而  
小赤色後鄭不從讀如涅者釋木云木相磨檄郭注樹枝  
相切磨說文云檄木相摩也从木執聲檄或从艸今注作  
熱省聲誤也

凡揉牙外不廉注廉絕也按說文云熾火揉車網絕也从火  
兼聲周禮曰揉牙外不熾是揉熾爲正字鄭本轉寫之失  
也上文揉幅必齊亦然說文云揉屈申木也从火柔柔亦  
聲易繫辭傳云揉木爲耒漢書食貨志作揉木爲耒當據  
正之

以爲樹圍注韜式之植者衡者也鄭司農云韜讀如繫綴之

綴謂車輿輪立者也立者爲轡橫者爲輶轡或作輪元  
謂轡者以其鄉人爲名按說文云轡車橫輪也从車對聲  
周禮曰參分輶圓去一以爲轡圓先鄭以輪立者爲轡許  
君以橫輪爲轡後鄭以轡字从對故以鄉人爲名當从之  
輶人云弧旌枉矢以象弧也注妖星有枉矢也蛇行有尾因  
此云枉矢蓋畫之按疏引孝經援神契云枉矢所以射隱  
謀輕又考異郵云枉矢狀如流星蛇行有尾是鄭君據考  
異郵而言也史記天官書云枉矢類大流星蛇行而蒼黑  
望之如有毛羽然蓋旌旗類此故畫之續漢書禮儀注引  
干寶曰枉矢象妖星非其義也枉蓋應爲枉直謂枉矢於  
弧此說違鄭終未允

幌氏云以浼水漚其絲注故書浼作涓鄭司農云涓水温水也元謂浼水以灰所泔水也漚漸也楚人曰漚齊人曰浹按說文云浼財温水从水兌聲周禮曰以浼水漚其絲故書作涓不得爲漚物之水當从浼也後漢亦作浼而義稍異謂以灰泔水者卽內則云和灰請漚也齊人曰浹當作倭曲禮曰共飯不擇手注擇謂倭莎也說文曰倭推也一曰兩手相切摩也切摩卽齊人曰倭之意

玉人云天子用全上公用龍侯用瓚伯用將注鄭司農曰全純色也龍當爲尨尨謂雜色玄謂全純玉也瓚讀爲餐餐之屨龍瓚將皆雜名也卑者下尊以輕重爲差玉多則重石多則輕公侯四玉一石伯子男三玉二石按說文云瓚

三五二石也。以玉質聲。禮子用全純玉也。上公用駮四玉一石。侯用瓚。伯用琫。玉石半用琫也。白虎通義引逸禮。王度記與後鄭合。說文以龍爲駮。與先鄭合。惟伯用琫。作用琫爲異。瓚。讀餐。履者。說文云。瓚。鬻也。从粥。侃聲。飾。或从食。衍聲。饋以羹。澆飯也。玉牖云。履。古文饋。內則云。狼臠膏。以與稻米爲醢。注以煎稻米。則似今膏履矣。此周禮醢食也。醢當从飭。是餐。履卽飭。饋。元人曲中。以不潔物曰臠。饋亦飭。饋之俗字也。

粹人云。願。脰。注。願。長脰貌。故書願。或作𦉰。鄭司農云。𦉰。讀爲鬣。頭無髮之鬣。按說文云。願。頭鬣少髮也。从頁。肩聲。周禮數目。願。頭。此與鄭注字同義異。或作𦉰者。願。𦉰。雙聲字。先

鄭讀爲髡者說文云髡鬣秃也从髟閒聲此卽無髮之謂也下文鱗之而注之而頰頰也說文云頰秃也从頁气聲舊音口沒反明堂位云殷樹豆注齊人謂無髮爲秃樹此樹又頰之假借

梓人云縝寸焉注鄭司農云縝籠網者縝讀爲竹中皮之縝按說文云縝持網紐也从糸員聲周禮曰縝寸段大令云讀爲竹中皮之縝當作讀如竹青皮筍之筍擬其音也筍于貧反今之筠字顧命禮器聘義注字皆作筍籛謂均旬古本通用筍今讀若損縝亦从員聲損亦从員聲又可爲縝讀如筍之證

廬人云灸諸牆以砥其橈之均也注灸猶柱也以柱兩牆之

閒輓而內之本末勝負可知也按說文云久從後灸之象人兩脛後有距也周禮曰久諸牆以觀其橈既夕禮云木析久之注久當爲灸士喪禮云幕用疏久之注久讀爲灸灸謂以葢案塞其口是久爲古文灸爲今文許君引周禮作久葢故書鄭君从今書作灸故注儀禮亦讀爲灸也

匠人云廟門容大局七个闢門容小局參个注大局牛鼎之屬小局臍鼎之屬按說文云臠以木橫貫鼎耳而舉之从鼎口聲周禮廟門容大臠七箇卽易玉鉉大吉也是作臠作箇者故書作局作个者今書也葢臠字从郊口之口讀若局今本說文作臠音莫狄切葢脫去臠字誤合二字爲一耳詳見易說記

司人云三色不失理謂之牛戴牛注鄭司農云牛戴牛角直  
一半披戴爲倒之假借說文云衡市也从人對聲戴倒聲  
同今人以直如其重者謂之換兌換兌亦當作倒

絲三邱漆三料注邱斛輕重未聞按說文云斛量也从斗與  
聲周禮曰黍三斛玉篇云斛余甫切今作庾陶人云庾實  
二斛注庾讀如請益與之庾之庾瓶人云豆實三而成斛  
是斛爲六豆合諸左傳四升爲豆則斛爲二斗八升三斛  
爲八斗四升矣竊疑此注中斛字有誤蓋斛卽庾已見陶  
人似不必再注况黍論鈞石不論權衡漢書貨殖傳云黍  
十大斗是也此當專言邱輕重未聞



閒莊疏記卷七

簡莊疏記卷八

海寧陳鱣撰

儀禮

士冠禮云筮于廟門注席謂禰廟釋文廟古廟字按說文云廟尊先祖兒也从广朝聲詹古文蓋篆文从朝聲古文从苗聲也詩清廟釋文廟本又作廟古今字此廟門釋文引劉昌宗廟音廟蓋以今字音古字猶地官迹人注迹之言蹟也升人注升之言礦也

筮與席所卦者注所以畫地記爻疏筮法依七八九六之爻而記之但古用木畫地今則用錢以三少爲重錢重錢則九也三多爲交錢交錢則六也兩多一少爲單錢單錢則

七也兩少一多爲圻錢圻錢則八也按春官大卜疏云三  
多爲交錢六爲老陰也三少爲重錢九爲老陽也兩多一  
少爲單錢七爲少陽也兩少一多爲圻錢八爲少陰也京  
房易傳云鬼爲繫爻財爲制爻天地爲義爻福德爲寶爻  
陸績注天地卽父母也福德卽子孫也同氣卽兄弟也此  
卽今火珠林之術所本

韎韐注縑韋也合韋爲之士染以茅蒐因以名焉今齊人名  
韋爲韎韐按釋艸云茹蘆茅蒐詩疏引李巡云茹蘆一名  
茜可以染絳說文云蒐茅蒐茹蘆地血所生可呂染絳从  
艸鬼聲茜茅蒐也从艸鹵聲詩豳彼洛矣云韎韐有奭傳  
韎韐者茅蒐染艸也一曰韎韐所以代韎也箋云韎韐者

茅蒐染也茅蒐𦰇𦰇聲也疏引駁異義云𦰇州名齊魯之閒言𦰇𦰇聲如茅蒐字當作𦰇陳畱人謂之𦰇是鄭君以𦰇爲茅蒐之合聲𦰇其別名𦰇卽𦰇之假借也

緇布冠缺頂青組纓屬于缺注缺讀如有頰者弁之頰緇布冠無弁者著頰鬪髮際結頂中隔爲四緇以固冠也頂中有緇亦由固頰爲之耳今未冠弁者著卷幘頰象之所生也滕辭名𦰇爲頰按說文云頰舉頭也从頁支聲幘髮有巾曰幘从巾責聲𦰇匡當也从木國聲釋文云幘蹟也下齊眉蹟然也箇恢也恢郭覆髮上也魯人曰頰頰傾也著之傾近前也蓋缺頰一聲之轉故缺讀如頰𦰇當從說文作𦰇蜀志諸葛亮傳云遺之中𦰇正作𦰇注云滕辭名𦰇

爲頰釋名云魯人曰頰者際辭與魯近也

有篋注篋竹器如笞者疏其宇皆竹下爲之故以竹器言之如笞者亦舉漢法爲况也按說文云匪器侶竹篋从匚非聲笞車笞也从竹令聲一曰笞贏也漢書韋賢傳云遺子黃金滿籬不如一經如漳曰籬竹器受三四斗今陳留俗有此器是匪侶竹篋又侶笞漢時亦謂之籬匪作篋者亦後人加竹也

贏注贏醢蜺蠃醢今文贏爲蝸按釋魚云蚘蠃蠃郭注卽蝸牛也說文云蝸蝸贏也从虫高聲蠃蜺蠃也从虫贏聲一曰蜺蠃蓋贏本蜺蠃之名而蝸亦名贏故說文一曰蜺蠃天官鼈人及士冠禮既夕禮注並以蠃爲蜺蠃也今

文嬴爲蝸者內則云蝸醜作蝸今文蠅當作虬

曰伯某甫注甫是丈夫之美稱孔子爲尼甫周大夫有嘉甫  
宋大夫有孔甫是其類甫字或作父按說文云甫男子美  
稱从用从父父亦聲是甫本从父故甫父通用尼父家父  
孔父春秋左氏傳俱作父鐘鼎文亦多用父也冠義記云  
章甫注甫或爲父今文爲斧甫斧俱从父也

冠義記云殷母注母名出于幃覆也言所以自覆飾也按說  
文曰部無母字鬼部覓字解云殷曰呀宋本作呀五音本  
集韻竝同類篇及小徐本作母淺人改也五經文字云字  
林作母經典相承彙省作母是本作呀也釋詁云訐幃大  
也詩斯干云君子攸芋傳芋大也箋云芋當作幃是呀與

撫通故云吁名出于撫也

士昏禮云某氏來婦敢奠嘉菜于皇舅某子注某氏者齊女則曰姜氏魯女則曰姬氏疏云某子者言若張子李子也按此舉二氏爲例猶假名甲乙之意急就篇云祖堯舜樂禹湯漢書魏相傳云中謁者趙堯舉春李舜舉夏兒湯舉秋貢禹舉冬此類皆假以侑之今人言張三李四鄭文王德亦有所自也

北止注止足也古文止作趾疏古文止作趾者雖疊古文趾爲足亦一義也按釋言云趾足也說文云止下基也象艸木出有趾故曰止爲足釋名云趾止也言行一進一止也左氏桓十三年傳云舉趾高漢書引作止高誘曰止足也

蓋古惟有止字故足字从止若止旁加足不已贅乎此古  
文止作趾疑當作古文止作址蓋假借址字後人以俗趾  
字改之也

記云笄緇被纁裏加于橋注橋所以殿笄其制未聞今文橋  
爲鎬按說文云鎬温器也从金高聲武王所都在長安鹵  
上林苑中字亦如此是鎬爲温器乃正義鎬京字假借用  
之說文鎬與鏹銚同訓温器卽鏹斗之類可目殿物古文  
作橋假借也

今吾子辱注以白造緇曰辱疏謂以潔白之物造置于緇色  
器中是汚白色猶今賓至己門亦是屈辱按說文云辱恥  
也从寸在辰下失耕時于封疆上戮之也溷溷暑也从水



辱聲是恥辱字作辱汚溲字作溲因溲从辱故假借通用  
老子云大白若辱則辱乃白之對蓋假辱爲溲也

士相見禮云若先生異爵者注先生致仕者也按曲禮云從  
于先生注先生老人教學者此教學之先生與致仕者不  
同鄉飲酒云就先生而謀賓介則與此同

鄉飲酒禮云主人揖先入賓厭介注賓之屬相厭變於主人  
也推手曰揖引手曰厭今文皆作揖按說文云揖讓也从  
手聃聲一曰手箸勺爲揖擡舉首下手也从手聃聲此厭  
爲擡之假借春官大祝云九曰肅拜注但俯下手今時擡  
是也左氏成六年傳云三肅使者杜注肅手至地若今之  
擡盞擡必舉首下手至地揖則手箸勺而已

鄉射云禮豫則鉤楹內注序無室可以深也周立四代之學  
於國而又以有虞氏之序爲鄉學鄉飲酒義曰主人迎賓  
於庠門外是也庠之制有堂有室也今言豫者謂州學也  
讀如成周宣榭災之榭周禮作序凡屋無室曰榭宜從榭  
州立榭者下鄉也今文豫爲序序乃夏后氏之學亦非也  
按豫序皆从予聲故通用孟子云序者射也故又與射通  
榭當作謝荀子王霸云臺謝甚高楊注謝與榭同淮南淑  
真云二者代謝舛馳高注謝敘也以敘訓謝猶孟子以序  
爲射也敘序亦通用

而后下射注后後也當從后疏引孝經說取孝經援神契之  
文彼說孝經云然后能保其社稷之等皆作后后者後也

故不從古文後是以云當從後按後爲正字后爲假借然  
后亦有後義釋名云后後也言在後不敢以副言也禮注  
大學而后有定等俱作后惟知所先後仍作後聘禮記注  
云而后然後也

枉長三仞注七尺曰仞疏仞者無正文王肅則依小爾雅四  
尺曰仞孔君則八尺曰仞所見不同也按說文云仞伸臂  
一尋八尺从人刃聲祭義云築宮仞有三尺論語云夫子  
之牆數仞集解包曰七尺曰仞莊子庚桑楚云步仞之正  
郭象注七尺曰仞與此注俱作七尺是也若如小爾雅作  
四尺則築宮仞有三尺不爲一丈而爲及肩之牆矣滄深  
一二仞無異滄深八尺矣蓋小爾雅本王肅之說耳說文及

孟子趙注淮南高注皆作八尺曰仞則與八尺曰尋無別亦誤

燕禮云幕用綌若錫注冬夏異也今文錫爲綌按說文云綌網布也从糸易聲暢或从麻釋名云綌衰綌治也治其麻使滑易也淮南齊俗云弱綌羅紈高注弱綌細布也史記司馬相如傳云被阿綌集解張揖曰細布也是綌爲正字錫爲假借爽服傳亦作錫注治其布使之滑易是也蓋此字从易故以滑易言之

升媵觚于賓注媵送也讀或爲揚揚舉也今文媵皆作騰疏檀弓下云杜蕢流而揚解注云舉爵於君也禮揚作媵揚舉也媵送也揚近得之此注騰與媵挾故讀從之也按射

義云揚觶而語注今禮揚皆作騰此所謂今禮者卽儀禮  
今文也檀弓注所謂禮作騰者儀禮古文也公食大夫禮  
云眾人騰羞者注騰當作騰騰送也咸象傳云騰口說也  
疏引鄭注滕字作騰騰送也集解虞翻曰騰送也釋文滕  
虞作騰蓋騰騰騰俱从朕聲故假借通用峻揚一聲之轉  
故讀或爲揚投壺禮云命酌曰請行觴行揚亦聲相近也  
大射儀云有豐注豐以承尊也說者以爲若井鹿盧其爲字  
從豆黼聲近似豆大而卑矣按說文云豐豆之豐滿者也  
从豆象形彗古文豐韻會引說文从豆下多从黼二字紫  
傳祛妄篇引李陽冰說豐云囚中之半乃鞞聲也徐鍇以  
爲象豆滿形足矣山是何義乎鱣謂陽冰雖多曲說然以

此條論之則說文原本當云从豆象形𦍋聲下列古文𦍋則从豆𦍋聲與鄭注儀禮合使說文但如今本从豆象形陽冰安能虛造𦍋聲之說乎況鄭注又其明證生部𦍋下當有重文𦍋云古文𦍋韻會云說文本作𦍋今文省作𦍋說文當爲古文蓋生字既建首故牲附部末𦍋不建首自宜列古文𦍋于𦍋下也𦍋从又持牲亦當从又持𦍋蓋牲者眾生竝立之貌𦍋乃艸盛𦍋𦍋之貌艸盛當埽故埽竹之𦍋从之耳

綴諸箭注古文箭作竹按說文云楛木也从木晉聲書曰竹箭如楛段大令曰當云周禮曰竹楛讀如箭今本轉寫誤亂也夏官職方云其利金錫竹箭注箭筱也故書箭爲晉

杜子春曰晉讀爲箭書亦或爲箭蓋許君所見周禮故書  
楷从木也吳越春秋云晉竹十庾正謂會楷竹箭箭晉音  
同故春官典瑞注縉紳作薦申

兩壺獻酒注獻讀爲沙沙酒濁特沛之必摩沙者也按春官  
司尊彝云獻酌注鄭司農云獻讀爲儀儀酌有威儀多也  
元謂獻讀爲摩沙之莎齊語聲之誤也煮鬱和秬鬯以醖  
酒摩莎沛之出其香汁也郊特牲云汁獻況于醖酒注獻  
讀爲莎齊語聲之誤也秬鬯者中有煮鬱和以益齊摩莎  
沛之出其香汁因謂之汁莎是鄭注三禮皆以獻爲沙蓋  
獻从犬虜聲虜从鬲戍聲與沙聲近故犧尊亦讀如沙尊  
因其形沙沙然詳見周禮疏記

聘禮云管人布幕于寢門外注管猶館也古文管作官今文  
布作敷按管館俱从官聲故通用易隨初九云官有渝釋  
文官有蜀才本作館有敷从專聲說文云專布也說卦傳  
云震爲專集解延叔堅說專爲大布詩長發云敷政優優  
左傳作布政優優

垂纁注纁所以藉圭也今文纁作璪按說文云璪玉飾如水  
藻之文从玉菜聲虞書曰璪火聘禮記云圭與纁注古文  
纁或爲藻今文作璪春官司几筵云加纁席畫純注鄭司  
農云纁讀爲藻率之藻典瑞纁藉注同又夏官弁師注纁  
當爲藻纁古字也藻今字也同物同名然則周禮故書及  
儀禮古文竝作纁司農易爲藻字意謂畫水藻文也許君



從儀禮今文作琫不从周禮故書儀禮今文耳

以二竹篋方注竹篋方者器名也以竹爲之狀如篋而方如  
今寒具筥筥者圓此方耳按說文云篋黍稷圓器也與鄭  
注不同淮南泰族云陳篋篋高注器方中者爲篋圓者爲  
篋蓋篋形外圓而內方故鄭注孝經云外方曰篋也天官  
籩人云朝事之籩注鄭司農云朝事謂清朝未食先進寒  
具口實之籩蓋漢時有寒具故此注云如今寒具筥疏云  
實以冬食故謂之寒具猶今人言點心也

車乘有五簋注簋讀若不數之數今文簋或爲逾按下記云  
十六斗曰簋注今江淮之間量名有爲簋者今文簋爲逾  
說文云簋炊奠也从竹數聲方言云炊奠或謂之筴蓋簋

逾聲近假借或又作筭耳此與斛實二斗之斛不同詳見周禮疏記包咸注論語十大斗曰庾蓋誤以穀爲庾耳

俶獻注俶始也古文俶作淑按釋詁云俶始也淑善也說文云俶善也从人叔聲詩曰令終有俶一曰始也是俶本訓善又訓始也古文蓋假淑爲俶經典相承通用詩燕燕云淑慎其身傳淑善也旣醉云令終有俶傳俶始也載芟云俶載南畝傳俶始也雜記云如何不淑注淑善也

帥大夫以入注帥道也古文帥爲率按說文云帥佩巾也从巾自悅或从兌聲率捕鳥畢也象絲网上下其竿柄也衛將衛也从行率聲玉篇云衛循也導也今或爲率釋詁云率循也石鼓文云悉衛左右漢朱龜碑云不衛天常今詩

悉率左右率由舊章俱作牽蓋衛爲正字帥牽俱假借經  
典相承通用易師六五云長子帥師作帥書舜典云百獸  
章舞作率春秋帥師俱作帥周禮使帥其屬俱作帥禮記  
中庸率性作率大學帥天下作帥儀禮覲禮云帥乃初事  
注今文帥作牽此注古文帥爲率各隨用之不一定也

賄用束紡注紡紡絲爲之今之縛也疏鄭注周禮內司服亦  
云素沙者今之白縛也則此束紡者素沙也故據漢法況  
之按說文云紡網絲也从糸方聲縛白鮮也从糸專聲急  
就篇云烝栗絹紺縉紅縵注絹生白縉似縑而疏者也廣  
雅云絜纒鮮支縠絹也釋文引聲類云縛今作絹是縛爲  
縉之疏者故素沙亦謂之白縛若今時之輕光絹矣

禮玉束帛乘皮注禮禮聘君也今文禮皆作禮按釋名云醴  
禮也釀之一宿而成禮有酒味而已也禮醴俱从豐故通  
用

赴者未至注謂赴告主國君者也今文赴作訃按釋詁云赴  
至也說文云赴趨也从辵卽省聲徐鼎臣校云春秋傳赴  
告以此字今俗作訃非是雜記云凡訃于其君注訃或皆  
作赴赴至也蓋赴爲正文訃爲隸俗儀禮古文作赴是也

記云出祖釋駘注行出國門止陳車騎釋酒脯之奠於駘爲  
行始也詩傳曰駘道祭也謂祭道路之神也春秋傳曰駘  
涉山川然則駘山行之名也古文駘作駘按說文云駘出  
將有事于道必先告其神立壇四通樹茅以欣神爲駘既

祭駮磔于牲而行為駮从車及聲夏官大馭云及犯駮注  
故書駮作罰杜子春云罰當爲駮駮讀如別異之別謂祖  
道磔駮磔犬也是周禮故書作罰儀禮古文作祓皆假借  
字鄭氏不從典說文合今詩及春秋傳皆作跋又與鄭注  
所引不同

賜饗唯羹飪注羹謂飪一牢也古文羹爲羔飪作臚釋文臚  
而甚反劉音審按說文云糲五味盃糲也从鬲从羹羔糲  
或省糲或从羹糲省羹小篆从羔从美飪大孰也从食壬  
聲臚古文飪恁亦古文飪蓋羹从羔古文省作羔臚卽古  
文飪今說文云恁夾古文飪恁見心部不宜重出當卽臚  
之誤

公食大夫禮云宰夫設黍稷六簋注古文簋皆作軌按說文云簋黍稷方器也从竹从皿从皀匱古文簋从匚飢匱古文簋或从軌軌亦古文簋春官小史云敍昭穆之俎簋注故書簋或爲几鄭司農云几讀爲軌書亦或爲簋古文也蓋周禮故書作几者匱之省儀禮古文作軌者匱之省易損卦云二簋可用享釋文簋蜀才本作軌渙六四云渙奔其机集解虞翻曰渙宗廟中故設机机卽古文簋今本作机釋文音几非也春秋繁露祭義云秋上机机實黍也正用机字机軌並从九故通用

鋼芼牛薺羊苦豕薇注苦苦茶也今文苦爲芾按特性饋食禮云鋼芼用苦注今文苦爲芾芾乃地黃非也說文云芾

地黃也从艸下聲禮曰剛毛牛薺芊芊豕薇許君所據本從今文作芊訓爲地黃與鄭君注不同也釋艸云芊地黃郭注一名地髓江東呼芊本艸云地黃味甘寒生者尤良一名地髓生川澤名醫曰一名芊一名芑生成陽黃土地者佳廣雅云地髓地黃也淮南覽冥云地黃主屬骨而甘艸主生肉之藥也是地黃今但爲藥物據許君所說則古者用以芼羹矣

嗇夫承命告于天子注嗇夫蓋司空之屬春秋傳曰嗇夫馳按左氏昭七年傳引夏書云嗇夫馳疏引孔傳嗇夫主幣之官傳蓋因覲禮而言也漢書百官公卿表云鄉有三老有秩嗇夫游徼嗇夫職聽訟收賦稅皆秦制也據此則鄭

注所云司空之屬者近是孔傳以爲主幣之官非也

喪服云傳曰斬者何不緝也左傳疏引馬融云不緝不緹也  
謂斬布用之不緹其端也衰用布爲之廣四寸長六寸當  
心故云在冑前也按說文云緝績也緹交泉也一曰裋衣  
也釋名云緝下橫縫緝其下也左氏襄十七年傳云晏嬰  
麤緹斬杜注斬不緝之也緹在冑前廣二升布蓋本馬說  
直經者麻之有賁者也左傳疏引馬融云賁者泉實糞麻之  
有子者其色麤惡故用之按釋艸云賈泉實泉麻郭注別  
二名說文云艸泉實也从艸肥聲贖或从麻賁淮南說山  
云見贖而求成布高注贖麻之有賁者可以爲布因求其  
成贖讀傳曰有蜚不爲災之蜚蓋艸从肥聲故高誘讀若



蜚肥賁一聲故又从賁儀禮及周禮籛人俱作賁假借也  
枕塊釋文塊本又作𡗗按釋言云塊塤也郭注土𡗗也說文  
云𡗗塤也从土一一屈象形塊或从鬼一切經音義引三  
蒼云𡗗土塊也此與爾雅注俱以或體訓本字蓋皆出于  
郭璞也漢衡方碑云寢闋苦𡗗所據儀禮作𡗗禮運云賁  
桴而土鼓注賁讀爲𡗗聲之誤也𡗗塤也謂搏土爲桴也  
歡粥朝一溢米夕一溢米注二十兩曰溢爲米一升二十四  
分升之一釋文溢如字劉音實射慈注同鄭王肅劉逵袁  
整孔倫葛洪皆云滿手曰溢按荀子儒效云屑然臧千溢  
之寶是權名假盈溢字而爲之者據此知今本孟子百鎰  
等及秦策萬鎰字皆俗人所改王肅之徒從溢字本訓解

爲滿手蓋有意違鄭也

從祖祖父母疏是曾祖之子祖之兄弟按釋親云父之世父  
叔父爲從祖祖父父之世母叔母爲從祖祖母郭注從祖  
而別世統釋名云父之世叔父母曰從祖父從已親別而  
下也此與喪服傳合魯語云公公父文伯之母季康子之從  
祖叔母韋注祖父舅弟之妻據此則謂之從祖叔父母矣  
從母丈夫婦人報傳曰何以小功也以名加也外親之服皆  
總也通典引馬融曰母之姊妹也言丈夫婦人者異姓無  
出入降皆以丈夫婦人之名名之又從母昆弟傳曰何  
以總也以名服也通典引馬融曰姊妹子相爲服也以從  
母有母名以子有昆弟名按左氏襄二十三年傳云穆姜

之姨子也杜注穆姜姨母之子與穆姜爲姨兄弟孔疏據父言之謂之姨據母言之當謂之從母但子效父言亦呼爲姨姨子昆弟卽喪服從母昆弟是也通典引袁準正論云從母小功五月舅緦麻三月禮非也從母緦時俗所謂姨母也舅之與姨俱母之姊妹兄弟焉得異服從母者從其母而爲庶母者也親益重故小功也凡偁父母者皆同乎父母之例者也舅非父列姨非母列故舅不偁父姨不偁母也可偁姨不應偁母爲姨母爲從母者此時俗之亂名書之所由誤也春秋傳蔡哀侯娶于陳息侯亦娶焉息媯將歸過蔡蔡侯曰吾姨也止而享之爾雅曰妻之姊妹同出爲姨此本名者也左傳臧宣叔娶于鑄生賈及爲而

卒繼室以其姪穆姜之姨子也以蔡侯爾雅言之穆姜焉  
得言姨此緣妻姊妹之姨因相爲姨也姊妹因謂爲姨故  
其子謂之姨子其母謂之姨母從其母而來故謂之從母  
從母姨母爲親一也因復謂之從母此因轉亂而遂爲名  
者也袁說尙不達禮意且不合雅訓爾雅母黨偁從母猶  
宗族有偁從父云爾如以爲從其母來故謂之從母夫從  
其母來則是媵矣古固有以姊妹爲媵者更有以姪爲媵  
者亦將謂之從母乎況從母而來之媵卽庶母也禮卽爲  
庶母之服何以又爲從母制服乎爾雅于宗族曰父之妾  
爲庶母子母黨曰母之姊妹爲從母子妻黨曰妻之姊妹  
同出爲姨姨之名于妻黨有此偁詩碩人云邢侯之姨左

氏莊十年傳云蔡侯曰吾姨也是姊妹各事一夫互稱爲  
姨非相從爲媵者蓋于母黨不當有此稱也自秦漢以來  
有稱從母爲姨者釋名云母之姊妹曰姨禮謂之從母爲  
姊而來則從母列故雖不來以此名之也是因當時有姨  
之稱故爲此釋而晉時蔡謨徐邈徐眾徐彥議禮遂有姨  
母姨兄姨弟姨妹之稱且以之稱庶母如南史齊宗室傳  
云衡陽王鈞年五歲所生區貴人病左右依常以五色餅  
飴之不肖倉曰須待姨差又晉安王子懋母阮淑媛病篤  
請僧行道有獻蓮華供佛者子懋流涕禮拜曰使阿姨此  
病和勝願華竟齊不萎蓋習俗相沿稱謂轉展混淆矣  
士喪禮云決用正王棘注世俗謂王棘砭鼠釋文砭劉音託

按漢書張湯傳云湯爲兒守舍遺鼠盜肉父怒笞湯湯掘  
熏得鼠及餘肉劾鼠掠治傳爰書訊鞠論報并取鼠與肉  
具獄磔堂下師古曰處正其罪而磔之也史記李斯傳云  
十公主砒死于杜索隱砒音宅與磔同古今字異耳此蓋  
假寘爲磔寘卽宅之古文轉寫之誤劉音託非也說文云  
梟斗可以射鼠注王棘砒鼠言王棘可以磔鼠耳

主人髻髮袒眾主人免于房注今文免皆作繞古文髻作括  
按說文云冕大夫以上服也从日免聲繞或从糸髻髻髮  
也从髟昏聲古文以免作繞以括作髻俱假借檀弓云免  
焉又云括髮俱同古文左氏宣十八年傳云袒括髮亦作

括

既夕云奠幣于棧注棧謂柩車也今文棧作輓按說文云棧棚也一曰竹木之車曰棧从木莢聲考工與人云棧車欲其弇注不革輓而柰之曰棧車是棧爲正字輓爲別字

士虞禮云酌酒酌尸注酌安食也古文酌作酌按說文云酌少少飲也从酉勻聲玉篇云酌余振切酌同少牢饋食禮注古文酌爲酌與此注同特性注則云今文酌爲酌錢詹事荅問云許君從古文必以酌爲酌學者多聞酌少聞酌故注文誤爲酌特性注云今文亦當爲古文所謂占三從二也陸氏釋文於酌無音蓋陸所見本已誤爲酌矣鮑謂經云酌酒酌尸特性云酌酌尸士昏禮有酌酌之文若云古文酌爲酌則酌酌相重矣以經證經彰明較著其當爲

古文醜作酌無疑也

取諸左脰注脰脰肉也古文曰左股上字從肉從殳殳之從  
聲疏鄭注儀禮疊古文從經今文又就古文解之者鄭欲  
兩從故也但字从肉義可知而以殳與股不是形人之類  
其理未審按說文云啞咽也从口益聲拜籀文啞上象口  
下象頸脈理也經文作脰者乃啞之誤記云取諸脰脰注  
古文脰脰爲頭啞可證也古文作股者說文云股髀也从  
肉殳聲蓋股從殳聲亦兼取髀股象杖之義故鄭君云從  
殳殳之殳聲也疏未明晰

記云他用剛日注今文他爲宅按說文云宅虫也从虫而長  
象窕曲衆尾形上古艸居患宅故相問無宅乎佗負何也



从人宅聲是宅爲正字比初六云終來有宅吉詩柏舟云  
之死矢靡宅檀弓云或敢有宅志俱作宅古文假借負何  
之佗隸變而爲他也

特牲饋食禮云尸以醋主人注醋報也古文醋作酢按說文  
云醕客酌主人也从酉咎聲酢醕也从酉乍聲今經典相  
承與說文互異易繫辭傳云可與酬酢詩楚茨云萬壽攸  
酢惟儀禮今文作醋此注古文作酢則通用已久矣

少牢饋食禮云來汝孝孫注來讀曰釐釐賜也按說文云來  
厓所受瑞麥一束二縫象叕束之形天所來也故爲行來  
之來詩思文云貽我來牟漢書劉向傳引作餽我釐麩云  
釐麩麥也始自天降是釐來同聲通用也

勿替引之注替廢也古文替爲袂袂或爲戴戴替聲相近釋  
文袂音決戴大結反劉士結反按說文云替廢一偏下也  
从竝白聲替或从日替或从𦉳此注古文替爲袂疑作秩  
詩小弁云秩秩大猷說文引作戴戴大猷秩戴與替聲俱  
近也

有司徹云乃𦉳尸組注𦉳溫也古文𦉳皆作尋記或作燔春  
秋傳曰若可燔也亦可寒也按說文云𦉳于湯中燔肉从  
炎从𦉳省𦉳或从𦉳一切經音義引聲類𦉳作燔燔二形  
又引字詁云燔古文燔二形今作𦉳同詳廉反此注古  
文作尋者同聲假借記或作燔者郊特牲云血腥燔祭注  
燔或作燔但燔字不見說文今春秋傳止作尋

簡莊疏記卷之八